

Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaat

Aalisarneq pillugu Inatsisartut inatsisaanni nr. 18-imi, 31. oktober 1996-imeersumi kingullermik Inatsisartut inatsisaatigut nr. 5, 21. maj 2002-imeersukkut allanngortinneqartumi, § 10, § 23, imm. 1, § 33, imm. 2 aamma § 34, imm. 3 malillugit aalajangersarneqarpoq:

Atuuffi

§ 1. Nalunaarut imartani Kalaallit Nunaata aalisarnikkut oqartussaaffigisaani inuussutissarsiutigalugu raajarniarnermut atuuppoq.

Nassuiaatit

§ 2. Nalunaarummi sumiiffiit pineqartut WGS84-imi nalunaarsorsimapput, iluarsiiissutinik imartat assinginut Kalaallit Nunaannut atuuttuni nalunaarneqarsimasunik iluarsisarlugit.

§ 3. Nalunaarummi matumani "Imartat Kalaallit Nunaata aalisarnikkut oqartussaaffigisaani" aamma "tunngaviusumik killeqarfik" paasineqassapput imartatut aamma tunngaviusumik killeqarfittut imartat Kalaallit Nunaata aalisarnikkut oqartussaaffigisaani pillugit statsministeriaqarfiup nalunaarutaanni aalajangersarneqartut.

§ 4. "Kalaallit Nunaata Kitaa"-tut paasineqassaaq NAFO-p imartaata 1-ip ilaa Kalaallit Nunaata aalisarnikkut oqartussaaffigisaaniittoq. "Kalaallit Nunaata Tunua"-tut paasineqassaaq ICES-ip imartaasa II-p, V-ip, XII-up aamma XIV-ip ilaat Kalaallit Nunaata aalisarnikkut oqartussaaffigisaaniittut.

§ 5. "Hareø-karsi" tassa imartaq 70° 20' N-ip aamma 70° 45' N-ip akornanniittoq kimmut 56° V-mik aamma kangimut tunngaviusumik killeqarfimmik killeqartoq.

Imm. 2. "Disko-karsi" tassa imartaq 68° N-ip aamma 70° 20' N-ip akornanniittoq kimmut 56° V-mik aamma kangimut tunngaviusumik killeqarfimmik killeqartoq.

Imm. 3. "Sisimiut-karsi" tassa imartaq 66° N-ip aamma 67° N-ip akornanniittoq kimmut titarnermik tunngaviusumik killeqarfimmit 6 NM-inik ungasissuseqartumik killeqartinneqartoq kangimullu tunngaviusumik aalisarnikkut killeqarfimmit titarnermik sammiveqateqartumik killeqartinneqartoq.

Imm. 4. "Qaqortoq-karsi" tassa imartaq 59° 58,6' N-ip aamma 60° 34,7' N-ip akornanniittoq kimmut titarnermik tunngaviusumik killeqarfimmit 6 NM-nik ungasissuseqartumik killeqartinneqartoq kangimullu tunngaviusumik aalisarnikkut killeqarfimmit titarnermik sammiveqateqartumik killeqartinneqartoq.

Imm. 5. "Banan-karsi" tassaavoq imartaq aalisarnikkut tunngaviusumik killeqarfiup aamma nunagisap tunngaviusumik killeqarfianit 3 NM-inik ungasitsigisup akornanniittoq, piffinni 59° 58,6' N-ip aamma 45° 21,9' V-p (Naujat) 60° 34,7' N-ip aamma 47° 34,9' V-p (Qeqertat kujallerpaartaat) akornanniittoq.

Sinerissamut qanittumi aalisarneq

§ 6. Angallatinut sinerissamut qanittumi raajarniarsinnaanermut akuersissummik (PRA-SQT-akuersissut) pigisaqartunut imartami Kalaallit Nunaata aalisarnikkut oqartussaaffigisaani kitaani aalisarnermi sineriak kangimut killeqarfiuvoq.

Imm. 2. Aalajangersakkami aamma pineqarput angallatit OUYZ, OYKA, OZTZ, OVOJ, OVXD, OWES aamma OWMZ-mik radiukkut attaveqartilluni ilisarnaateqartut.

Imm. 3. "Banan-karsi"-mi aamma "Qaqortoq-karsi"-mi raajarniarneq angallatinut, OYKA, OZTZ aamma OVOJ-mik radiukkut attaveqartilluni ilisarnaatilinnut inerteqqutaavoq.

Imm. 4. " Hareø-karsi"-mi aalisarneq angallatinut OVXD, OWES aamma OWMZ-mik radiukkut attaveqartilluni ilisarnaatilinnut inerteqqutaavoq.

§ 7. Angallatinut sinerissamut qanittumi raajarniarsinnaanermut akuersissummik pigisalinnut angallammi nammineq tunisassiornissamut akuersissuteqarfigineqarsimasunut (akuersissut PRA-SQNT) imartami Kalaallit Nunaata aalisarnikkut oqartussaaffigisaani kitaani aalisarnermi tunngaviusumik killeqarfik kangimut killeqarfiuvoq. Taamaattorli piffissami 1. april-imit 31. oktober ilanngullugu, kitaani 61° N-imit 65° N-imut tunngaviusumik aalisarnikkut killeqarfimmit 3 NM-inik avasinnerusoq kangimut killeqarfiuvoq.

Imm. 2. Angallatit tamakku "Hareø-karsi"-mi, "Sisimiut-karsi"-mi aammalu "Banan-karsi"-mi aalisaaqusaanngillat.

Imm. 3. 70° 45' N-ip avannaani najugaqarfiit kaajallallugit 5 NM-inik illersuutissatut killeqarfiit malinneqassapput aamma tamanna qilalukkat qernertat qaqortallu piniagaaffini mattussigallartarnernut atuuppoq.

Avataasiorluni aalisarneq

§ 8. Angallatinut avataasiorluni raajarniarsinnaanermut akuersissummik pigisalinnut angallammi nammineq tunisassiornissamut akuersissuteqarfigineqarsimasunut (akuersissut PRA-ANT) imartami Kalaallit Nunaata aalisarnikkut oqartussaaffigisaani kitaani titarneq tunngaviusumik aalisarnikkut killeqarfimmik sammiveqateqartoq 3 NM-inik ungasissusilimmiittoq kangimut killeqarfiuvoq.

Imm. 2. Angallatit tamakku "Hareø-karsi" -mi, "Disko-karsi"-mi, "Sisimiut-karsi"-anni, "Banan-karsi"-mi aamma "Qaqortoq-karsi"-mi aalisaaqusaanngillat.

Imm. 3. 61° N-imit 65° N-imut tunngaviusumik killeqarfik tikillugu 1. novemberimit 31. marts ilanngullugu aalisartoqarsinnaavoq.

Imm. 4. "Hareø-karsi"-p aamma Sigguup akornanni angallatit taakku allorniusaq kimmukartoq 55° tikillugu aalisarsinnaapput, kisiannili Sigguup kujataani sineriammiit 3 NM-inik avasinnerusumi.

Imm. 5. 71° 30' N-ip avannaani tunngaviusumik killeqarfik tikillugu najugaqarfiit kaajallallugit 5 NM-inik illersuutissatut killeqarfiit kiisalu piffissat qilalukkat qernertat qaqortallu piniagaanngiiffi malillugit aalisarneq ingerlanneqarsinnaavoq.

§ 9. Angallatinut Kalaallit Nunaata Kangiani, (Tunup imartaani) raajarniarsinnaanermut akuersissummik (PRA-TNAA-akuersissut) pigisaqartunut imartami Kalaallit Nunaata aalisarnikkut oqartussaaffigisaani 44° 00' V- p kangiani aalisarnermi tunngaviusumik killeqarfik kimmuk killeqarfiuvoq.

Imm. 2. Imartami 61° 49,6' N-ip aamma 62° 51,9' N-ip akornanni (Timmiarmiut kangerliumarngani) aammattaaq tunngaviusumik killeqarfiup iluani aalisarneq akuerisaavoq.

§ 10. Nunat allamiut angallataannut raajarniarsinnaanermut akuersissummik (PRA-NAA-akuersissut) pigisaqartunut imartami Kalaallit Nunaata aalisarnikkut oqartussaaffigisaani tunngaviusumik killeqarfimmit 12 NM-it iluanni aalisarneq inerteqqutaavoq.

Pineqaatissiissutit

§ 11. § 6, imm. 1, 3 aamma 4-mik, §§ 7, 8, 9 aamma 10-imi killeqarfinnik unioqqutitsineq akiliisitsinermik kinguneqassaaq.

Imm. 2. Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiiffik imaluunniit piginneqatigiilluni umiarsuaatileqatigiiffik unioqqutitsippat ingerlatseqatigiiffik taannaatillugu akiliisitassatut akisussaasunngortinneqarsinnaavoq.

Imm. 3. Pinerluttulerinermi inatsimmi arsaarinnittarneq pillugu malittarisassat taamatuttaaq atorineqassapput.

Imm. 4. Kalaallit Nunaata eqqaani aalisarnermi malittarisassanik akuersissummiluunniit piumasaqaatinik unioqqutitsineq taassuma atorineqarsinnaatitaaneranut killiliissutinik kiisalu pissutsit ilungersunarnerutillugit imaluunniit unioqqutitsisoqaqqitsillugu piginnaatitaaffimmik arsaarinninnermik kinguneqarsinnaapput. Tamakku pillugit naalakkersuisut aalajangiissapput, nalunaarutigineqarneranillu ullut 15-it qaangiutsinnagit Nunatta Eqqartuussivianut, suliaasannngortinneqarsinnaalluni aalisarneq pillugu inatsimmi § 21, imm. 4 malillugu.

Imm. 5. Pineqaatissiissutit pillugit suliat allatigut aalisarneq pillugu inatsimmi aalajangersakkat malillugit suliarineqassapput.

Atuutilerfia

§ 12. Nalunaarut 1. september 2002 atuutilerpoq.

Imm. 2. Peqatigitillugu Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaat nr. 20, 8. august 2002-imeersoq atuukkunnaarsinneqarpoq.

Namminersornerullutik Oqartussat, ulloq 29. august 2002

Hans Enoksen

/

Amalie Jessen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut